



Erwin Ardüser, nov schef dals servetschs da programm, e Gian Ramming, nov schefredactor.

MAD

# Novs tgmuns tar RTR

RTR cun nov schefredactor e nov schef dals servetschs da program

■ (cp) Gian Ramming è il nov schefredactor da Radio e Televisiun Rumantscha ed Erwin Ardüser il nov schef da la partiziun «servetschs da program». Quell'elecziun è vegnida fatga oz dal cussegl d'administraziun da la SRG SSR idée suisse Svizra Rumantscha SRG.R sut il presidi da Duri Bezzola sin proposta dal nov directur da RTR, Mariano Tschuor. Ils novelegids entran en lur nova piazza cun l'entschatta matg 2009. Cun quella elecziun va il project da la convergenza tar RTR en la davosa etappa. Gian Ramming (51) ed Erwin Ardüser (47) lavuran gia tar l'interpresa RTR. Ardüser dapi 1993, ils davos onns sco manader dal Radio Rumantsch e commember da la direcziun. Gian Ramming è entrà 2003 tar RTR, dapi in onn sco substitut dal schefredactor e dapi l'october 2008 sco schefredactor ad interim. Omadus enconuschan fitg bain tant l'interpresa RTR ed il concern SRG SSR idée suisse, sco era il mettier da producir e gestiunar programs per radio, televisiun e multimedia.

Sco schefredactor è Gian Ramming responsabel per tut ils cuntegns publicistics per radio, televisiun e multimedia. Cun questa funcziun è el er commember

da la direcziun RTR. El succeda a Mariano Tschuor, ch'è vegnì elegì directur RTR. Gian Ramming è burgais da Schlargigna, ha terminà ses studi a l'universitad da Turitg cun ina lavur sur da l'ovra litterara da Reto Caratsch, è stà plirs onns delegà da la Crusch Cotschna en la Strivla da Gaza, en ex-Jugoslavia ed a Sierra Leone. Otg onns ha el lavurà sco redactor tar il Bündner Tagblatt e tar la Südostschweiz.

Sco schef dals servetschs da program e commember da direcziun maina Erwin Ardüser la nova partiziun «servetschs da program». Quella include 4 differents ressorts: il secretariat da program, la communicaziun ed il marketing, ils archivs e la produenziun da portatuns e portafilms. En il ressort communicaziun e marketing è era integrada l'analisa e retschertga da program. Erwin Ardüser è burgais da Laax, ha suenter sia scolaziun commerciala lavurà en pliras firmas, uschia era tar la Lia Rumantscha sco manader dal post d'ediziuns e manader dal secretariat. Tar il Radio Rumantsch ha el lavurà sco redactor, moderatur e correspondent regional. En sia funcziun sco manader dal Radio Rumantsch è el stà responsabel per l'offerta dal program e per divers projects

(RR24: schlargiament dal program). En quella davosa funcziun fa el gia part a la direcziun da RTR dapi 1999.

Mariano Tschuor, il nov directur da Radio e Televisiun Rumantscha, è satisfatg da l'elecziun: «Cun Gian Ramming ed Erwin Ardüser èn duas persunas cun autas qualificaziuns professiunalas elegidas ch'empermettan da realisar a fin la convergenza tar RTR e da sviluppar enavant RTR tar ina chasa da medias moderna cun varias offertas publicisticas per la Svizra rumantscha.»

Dapi il zercladur / gün 2006 lavuran Radio Rumantsch, Televisiun Rumantscha e multimedia RTR sut in tetg en la Chasa RTR a la Via da Masans a Cuira. Quai mument ha ina convergenza natirala cumenzà: la collavuraziun stretga tranter las redacziuns da radio, televisiun e multimedia. Latun 2007 è quai process vegnì instradà sistematicamain en ils ressorts da program. Quella fasa d'introducziun va a fin la stad 2009. Sco consequenza, ed en vista a novas sfidas e pretensiuns, ha RTR decidì d'optimar ed adattar las structures da la direcziun ed il management da programs. L'elecziun dad Erwin Ardüser e Gian Ramming introducecha ussa quella davosa etappa.